

四庫全書

集部

欽定四庫全書

集部

文苑英華卷七百二十九至
二十一

詳校官監察御史_臣范衷

助教_臣常循覆勘

總校官進士_臣朱 鈐

校對官中書_臣王 瓚

謄錄監生_臣趙位堂

欽定四庫全書

文苑英華卷七百十九

宋 李昉等 編

餞送二

送趙郎將使黔中序一首

送吉州杜司戶審言序一首

暉上人房餞齊少府使入京序一首

餞陳少府從軍序一首

送懷州皇甫使君序一首

送尹補闕入京序一首

三月三日於灞水曲餞豫州杜長史別昆季序一

首

送裴五司法赴都序一首

袁侍御序餞永昌獨孤少府序一首

鄴公園池餞韋侍郎神都留守序一首

餞常侍舒公歸覲序一首

餞宋司馬序一首

景龍觀山亭集送密縣高贊府序一首

送李郎中赴京序一首

送李侍御之芳默中掌選序一首

送張補闕歸鄴序一首

送蔣曹充隴右營田判官序一首

送裴叅軍充大稅使序一首

送遂州紀叅軍序一首

送康若虛赴任金鄉序一首

送竇侍御知河西和驪還京序一首

送王侍御赴劍南序一首

送翹郎將使默啜序

陳子昂

蓋問北夷不羈之日久矣天子垂玄默穆皇風而狼居
草心蟻伏請職歲一月上將恤戎乃以金草假翹公為
司賓卿載馳錦車諭意雲幕且欲頓單于之膝受呼韓
之朝不踰青春復命紫闕其忠臣烈婦之節感激壯矣
朝廷以遠赴集作赴此絕國追送郊邱集作近郊登熊山望雁塞

黃雲千里亭臯悠然僉曰賦詩絕句以贈

送吉州杜司戶審言序

前人

嗟乎德則有隣才不必貴昔有耕於巖石而名動京師

詞感帝王乃位昇

一作

武騎夫豈不遭昌運哉蓋時命

不齊竒偶有數當用賢之世賈誼竄於長沙居好文之

朝崔駟放於遼海况大聖提象羣臣守規杜司戶炳靈

翰林研幾策府有重名於天下而獨秀於朝端徐陳應

劉不得劇其壘何王沈謝適足靡其旗而載筆下察三

十餘載秉不羈之操物莫同塵合絕唱之音人皆寡和
羣公愛禰衡之俊留在京師天子以拒譚之非謫居外
郡蒼龍閣茂扁舟入吳告別千秋之庭迴棹五湖之曲
朝廷相送駐旌蓋於城隅之子孤游淼風帆於天際白
雲自出蒼梧漸遠帝臺半隱坐隅丹霄巴山一望魂斷
涿水於是邀白日藉青蘋追瀟湘之游寄洞庭之樂吳
歛楚舞右琴左壺一作左
琴右壺將以緩燕客之心慰越人之
思杜君乃挾琴起舞抗首高歌哀皓首而未遇恐青春

一作雲

之蹉跎且欲攜幽蘭結芳桂飲石泉以節味

一作明節

詠商山以卒歲返耕餌朮吾將老馬羣公嘉之賦詩以

贈凡四十五人具題爵里合絕

集作舍絕

暉上人房餞齊少府使入京序

前人

永淳二年四月孟夏東海齊子官于此州雖黃綬位輕而青雲望重故能委邦君而坐嘯屈刺史而知名屬乎鑾駕巡方諸侯納貢將欲對揚天子命我同行

集作行人執

玉帛而當朝擁駢駢而戒道指途河渭發引岷嶓粵以
丙丁之日次于暉公別舍蓋言離也爾其巖泉列坐竹
樹交庭吐青藹於軒牕棲白雲於左右參差池榭亂山
水之清陰繚繞階庭雜峯岬之異勢入禪林而避暑肅
風景於中林開水殿而追涼徹氛埃於戶外瑤琴合奏
翠竿時行談窈窕於天人極留連於晷刻既而歡樂極
良辰征攀白日而不迴唱浮雲而告別山光黯黯凝綠
樹之將曛嵐氣沉沉結蒼雲而遂晚雖同交未阻風月

可留岐路方乖關山成恨嗟乎朝廷子入期富貴於崇
朝林嶺吾棲學神仙而未畢青霞路絕朱紱逶迤言此
會之何時願相逢而誰代永懷千古豈知仁者之交凡
我三人盍崇不朽之迹斯文未喪題之此山同疏六韻

云爾

清陰

集作
清音

餞陳少府從軍序

夫歲月易得古人疾沒代不稱功業未成君子以自強
不息豈非懷其實思其用然後以取海內之名以定當

年之策展其才力受以驅馳少府叔鳳彩龍章才高位
下班起遠慕每言關塞之勳梁竦長懷恥為州縣之職
屬胡兵犯塞漢將臨邊商君用耕戰之謀充國起屯田
之策皇華出使言收疆場之功白水開筵遂為雲雨之
別爾其蒼龍解角朱鳥司辰溽景薰集作天炎光折地
山川漸遠行人動游子之歌樽酒未空送客起貧交之
贈嗟乎揚朱所以泣岐路蘇武所以悲絕國古之來矣
盍各言志以敘離歌

送懷州皇甫使君序

宋之問

旬服三百里共京都叅化良吏二千石與天子分憂
懷與區必寄能者皇甫使君累司寵職夙著香名威惠
歷刺於外臺風流載欵於京國議者應南宮之象實謂
光朝使乎奏西河之能更勞為郡檐帷即路供帳出郊
宿雨碧滋浮漢城之氣色朝陽紅景入太山之草樹新
豐美酒不換離心函谷重關能搖別恨河內未理暫借
寇恂潁川既輯佇歸黃霸廟堂側席羣公以尚義相高

川陸分途我輩以贈言為貴况筵開灞岸路指太行請
居人贈王粲之詩去者留阮公之作

送尹補闕入京序

河間尹公博物君子解褐調慈州司倉白雲在天不樂
為吏有竹林近鄆杜南山彈琴讀書日益淪放雖道貴
物外久無世情身退名高再顯天爵遂使公卿舉手羔
雁成羣無何勅書到秦徵詣函洛天子以其老成達學
昂藏有古人風命典著書職在補闕時議以為伯喈得

召仲甫登聞既而藉馬入關西攜老幼重見喬木載馳
舊山念出處事違居人惜別離車將遠凡我同志賦詩
贈行

三月三日於灞水曲餞豫州杜長史別昆季序

前人

上巳佳游近郊春色朱軒映野見東流之袂禊白雲在
天愴南登之送別杜長史言辭灞澹將適荆河戀舊鄉
之喬木藉故園之芳草鵠原四鳥是日分飛輿泉二龍

此時云遠綠潭一望青山四極秦人去國乘石輔之脩
途洛客思歸憶東京之曲水請染翰操紙即事形言各
賦蘭亭之詩咸申葛陂之贈

送裴五司法赴都序

夫有別必感今昔共之蓋理逼聚散事均窮達望秦是
斷腸之所况念故園懷洛多掩涕之人更分良友裴五
官業傳河寶才誕岳靈彩思有神鬚眉若畫一日不見
鄙恹都生千里送歸風流忽遠朝英出餞迴北走於郊

隅野墅銷雲引南山於庭際客飲恨而歡促席含情而
景遲目喬樹之將華青門戀舊背芳萱之稍吐金谷逢
春舉杯伊何願君軫之少駐賦詩於是旌余志之所之
敢謂座賓盍宣離唱

袁侍御席餞永昌獨孤少府序

前人

春其暮兮勞志士之幽歎友其行矣結吾徒之遠悲豈
不以時物華歲好事者賞而不足名流才子相歡者懷

而不見河南獨孤冊風儀松竹詞賦雲泉清義多

一作許

南史之才選署半

一作曹署

北部之慰袁侍御風霜利器金

石宏材執憲稱柱下之雄禮士採域中之俊爾乃撰辰

開宴考地疏筵落花覆沼懸藤掃砌竹林以清氣娛賓

蘭畹以芳心愛客環坐三尺起君子之風祖道百壺酌

賢人之酒去留交軫舞詠相喧管召魚樂杯薰鷲醉此

時奚

集作生

怨盛集無何是日增悲韶芳亦盡啼鳥送晚

遙棲御史之林班馬嘶歸近送舍人之驛夫登高動詠

贈遠形言豈鄙懷之庶幾乃羣公之事業盍請離唱用
貴洛陽之紙焉人採一言各題四韻

鄴公園池餞韋侍郎神都留守序

張說

夫良才出乎休運大任歸乎令德四海既安乃注意於
賢相兩都分正實具瞻於師尹鸞臺侍郎兼左庶子韋
公國之楨幹人之表儀矜嚴有叔子之容持重得揚公
之望門集作閨通禁省當朝稱累代之名管綜諸闡帖職

盡一時之美頃以五星東聚八月西巡武王既入於鎬

京君陳當往於洛邑者

集無者字

中日晷之盈縮均天宇之

會同清廟明堂政理之本也教倉武庫兵食之原也機

務所總半天下之軍國聽訟寔繁連海隅之郡縣恩有

密而處遠事有疎而授親腹心遐寄惟賢是屬歲臨單

闕月在長嬴同蕭何之居守當陰識之留鎮北闕拜辭

西堂宴餞大君垂藻承

集作乘

月露之光榮元良賜服被

星海之耀潤執事以同列之好載壺酒而送行鄴公以

彌甥之禮掃郊園

集有而字

留別此地有離洲別嶼竹館荷

亭曲沼環合而連注叢山相望而間起幽隱長寂蕭條
遠風通終南之雲氣下昆明之水烏爾其駐馬青林肆
筵碧岸清管四發坐客增悲高臺一望游人忘返韋公
方祇率嘉命保釐成周樹之風聲流我王澤然而臨觴
不樂首路遲遲瑣闥夕拜戀未央之宮闕錦服晝游懷
杜林之桑梓層城日下高蓋雲飛天子賦詩已載寵行
之史羣公盛集酒傳出宿之文凡若干首合成一卷陸

生何幸暫游朝宰之間商也悲然輕述國風之序云爾

錢常侍舒公歸覲序

蘇頌

右散騎常侍兼國子祭酒崇文館學士舒公邦之碩儒也富於學深其智秉辟雍之禮講金華之義者嘗有日焉辨大而言若訥位高而志益下造膝則人無異辭匪躬則我有餘力儀正可象聲希必應此所以孔光察而張輔寵也故進避榮而榮自取退宗讓而讓得之既而命列幡旂焜煌照於西第徒成俎豆眷戀馳乎東國每

洒涕而祈主將候顏以拜親天子懷公達之舊惜康成
之往乃睽中留久而下制是月惟閏乘春載陽服老萊
之衣飄組丈二擁終童之傳送車數百晨省偉其傳呼
晝游嘉其飲餞來而喜懼經躍鯉之新泉至則光輝對
迴龜之舊浦夫志於道者二三子之莫逮善於孝者千
萬人之所說未有丹誠注於闕下白首登於堂上門生
仰而結轍邦牧趨而負弩豈非訓虞一作處受封就宋傳
業俾魯師之教者其馮母之榮乎於是絲庭華省之家

虎觀鴻都之士屬鶴鷓鳴矣揚柳依依情搖江上之楓
思結河邊之草吳州日見楚山雲絕莫不捧袂黯然彈
毫以贈庶幾離言之至知儒行之尊歟

餞宋司馬序

張九齡

宋司馬才通命塞雲翼泥盤

集作
蟠

蔡邕朔方不廢琴書

之業賈誼宣室欲言鬼神之事既而出宿南浦與鴻雁

而

集作
以

同歸追餞北梁對江山

集作
丘山

而不樂是日渚雲

欲霽林鳥將春惜時物之芳華重情人之自遠羣公有

感中座無歡他日清風自當玄度之夕茲辰零雨得無
子荆之詠遂相與援翰賦詩贈行

景龍觀山亭集送密縣高贊府序

前人

景龍東山初生弟也始其署金榜築鳳臺窮土木之功
極岡巒之勢議與盤古集作石同體造化較力何其壯哉

自吾君茅茨不翦采椽不斷既抑華而務實將設教以
垂範以故平陽化焉罷歌舞於其地麻姑見者變桑田

於此時所謂長女之宮鬱為列仙之館其後常集作嘗有

好事以為勝游今日芳辰攜手接袂往往而在祇取樂

焉高十官雌伏都畿星言至止聞殊庭之可尚名嘉客

以相驩徒觀其匠幽竒宅爽塏十里九坂豈唯梁氏之

作千巖萬壑宛是吳中之事青林脩竦集作聳而垂綵綠

蘿蒙籠以結陰清流若鏡下照金沙之底雜花如錦傍

綠石菌之崖則可以藻飾形神揮斥氛滓相顧風塵之

表無負雲霄之槩既而東主西賓酒酣樂闋聚必有散

匪伊麋鹿之羣往而不返固亦山林之弊高公乃振衣而起舉杯有屬却計送人出長安之東道退思征馬向洛陽之南陌雖暫勞於州縣迫於簿領方欲厭於承明資其騫躍夫如是相知意氣何恨化離盍賦詩焉以贈行者

送李郎中赴京序

孫逖

今上有天下之十載鑿輅在郾而大夫師長庶士御事分曹成周俾贊居守歲八月詔下東都召水部員外郎

李公拜工部郎中崇德也李公主善秉哲敏才慮行葆
光能明冥樞自達始以茂才擢第與今中書舍人許公
俱補廣陵掾相與沿達淮泗嘯詬雲物雅頌有鑠東南
有光官匪慢而趣成道不行而樂在自時厥後蓋四三
年或翰飛禁垣或鷹騰仙闕接武軒陛迭耀冠劍夫豈
求之歟皆溫良恭儉讓以得之也所謂謙受益德必聞
崑崙琅玕南國橘柚無遠不屆彼何言哉傳置具車僕
亭出餞西顛沆碣北陰肅殺風落峭澗霜飛河濱金羈

載馳紫亭何遠夫居四民時地利周所以貴冬官草奏
議應列宿漢所以寵郎署之人也之德也必能簡孚乃
職克休厥聲天秩虛求名疑庭反席矣凡今作者賦詩
贈行

送李侍御之芳黔中掌選序

高陽氏之才子侍御其人焉夏之文求也藝兼而有之
矣頃者持斧河朔獨按專城明罰飭法所向風靡是以
有黔中之往俾脩河朔之政不然者何萬里而南為至

如遐荒靡莫之俗置吏羈縻之道則衆賓敘之矣倦談者何得而稱焉

送張補闕歸鄴序

余射策於洛城南門者有年數矣補闕張子嘗同彙征
逮揮翰於禁庭又聯官於近侍人各有舊所貴於同聲
吾愛其才敢忘於久要承明厭直河朔言歸且鄴惟舊
都漳有深涉昔聞七子今在一門北州為營常有聚星
之會西垣贈別請陳零雨之詩

送蔣曹充隴右營田判官序

前人

古之使臣必有命介所以謀闕計事類能撰功蔣侯之
往佐輜軒蓋其義也夫其敏行精識長才博聞克荷詩
禮之訓聿脩清白之業故妙年從官已著老成之風卑
飛未騁共許垂天之翼是行也必能使田有封洫事著
典常儲峙孔殷甲兵不頓愛人許國何以尚茲時中丞
公亢寵天朝而子勤役邊鄙豈不以策名委質者義方

之大訓出入顧復者常情之小慈不貴垂堂之說遂嗤倚門之望懿乎哉又聞君子之遠其子也河隴先秋鷹隼方擊替成糾慝今也其時羣公題之賦詩以贈

送裴叅軍充大稅使序

古之王者稅公田衡虞之人給郊廟賜與之用無有遠邇咸率乃職越會稽郡者海之西鎮國之東門都會蕃育膏肆兼倍故女有餘布而農有餘粟以方志之所宜供天府之博斂筐絲紵緡金刀浮江達河命為汎舟之

役撰功底績實賴飲水之使是行也裴子為政焉乃命
水工具行器節制費用詳度川陸指洞庭以北上向長
安而西去談笑之外厥有成功樽俎之間見其從事展
使能者非子而誰而疇昔交情今茲吏道歎淪落於荒
服結殷勤於官次喬木之國子其歸乎篁竹之鄉余何
為者肝膽楚越始合終離嗚呼岐路素絲得其幾矣十
月冬旱三江晝晴夢故園之黃落見長河之鴻雁澤國
山水天資助人災方草樹歲寒未入居者愛客行者徇

公拜神禹之清祠泛伍員之濤水車馬疊跡傾越人於
外郊樓船接艦溢吳歌於寒浦贈君以不拜戒君以登
陟攬涕何道賦詩詠曰

不錄

送遂州紀叅軍序

遂州參軍紀公吾友雲將之令弟也敏於行志於道克
脩民彛允副兄勗噫周公之胤紀為其首天祚明德必
將有後不然何隸華之可久也選曹舉善羣吏湏才九
霄始構一命而偃穆卜吉日遄征畏途緬躋岷峨遐涉

褒漢宿息巖險凌臨湍悍仗信不慄載義必亨方慕忠
臣之志固無垂堂之責爾之寡兄克施有政是則是效
念茲在茲福利則覩心永隔遠嫌則荒言自絕固雖卬
蹙之產巴蜀之饒不潤脂膏誰謗蕙以懋厥丕德時維
哲人羣公贈言要僕題序

送康若虛赴任金鄉序

昔太史公涉汶泗登鄒嶧以觀孔氏之遺風康子之吏
於是邦有以見古人之心矣况大君出豫將事升中之

禮有司擇人俾佐奉高之邑利在求舊急於使能位俾
才難亦可宗也夫強學者義之用工文者藝之本明識
者智之府令名者德之輿子曰疑四德以待百事如農
之既勤若射之有志行無越思往無不利彼游刃於理
劇固恢恢乎有餘地矣初余以朋友之故謫居荒服憔悴
湘沔縉雲不調明時殆將十載是舉也所謂理舊汙
續常職信有國之令典知若人之晚成五月鳴蜩載驅
翹翹贈之維何折彼桑條餞之維何席彼蒹葭炎雲在

天景風拂野時燠方熾吾子勉之請各賦詩以無忘平生之好

送竇侍御知河西和羅還京序

高適

天子務西州之實歲羅億計何始於貴取而以耗稱俾邊兵受寒戰馬多庾輓域中之稅鑄海上之山江淮之人蓋奔命矣豈財賦之地抑以從來將利害之鄉猶有所關廟堂精思其故表竇公自憲闡而董之關精

集作
開釋

叢脞之病發揮鹵莽之極政之大者不其然歟今農夫

力於必登廉賈知夫勇賤鳴

集作於

戲若惟思之義以見

天下之兵我幕府涼公勤勞王家常用此道干戈所適

戎狄相弔宜哉八月既望公於是領錢穀之要歸奏朝

廷副節制郎中裴公軍司馬員外李公追臺閣之舊游

惜軒車之遠別席樓船於池上泛雲物於城下胡琴

集作

茹羌笛繚繞隈隩儻羅拉

集作眩

裴映帶洲渚醉後歡甚

東日遐瞻

集作東林日高

語岐路於樽前指華京於天眇有若

司直崔公之逸韻嘉其廷評數賢之間作適忝斯人之
後敢拜首而序云

送王侍御赴劍南序

陶翰

國家既誅邛笮之游魂收滇池之陳地以蠻貊君長未
即叙徼外新國約非甚堅將欲宣王風布中典必候才
英矣監察御史王公志標勁節天假異能秉心而忠義
必聞多方而文武不墜我中丞鮮于公以功名立破城
江南關啟而虜不敢窺城峻而敵不敢守者皆倚匡時

之策仗橫行之氣不然者豈有夕捨一尉旦磨

疑作三磨

軍盱衡於不毛之間決勝於大荒之表取廷評者泱月
登憲府者周星繡衣照於江原風霜掃於劍壁斯不足
畏矣中朝名雅嚮義趨風餞筵傾誠翰墨紛囑百壺追
送來登董原之野萬嶺蒼然更繞華陽之國予以授簡
敢無斯文

文苑英華卷七百十九

欽定四庫全書

文苑英華卷七百二十

宋 李昉等 編

餞送三

送封判官攝監察御史之磧西序一首

送史判官之河南序一首

送李叅軍水運序一首

送李叅軍序一首

餞崔朔司功入計序一首

送蕭少府之幽州序一首

送崔司戶過隴迎大夫序一首

送崔二十一之上都序一首

送孟大入蜀序一首

送惠上人還江東序一首

送王大拔萃不第歸睢陽序一首

送盧涓落第東還序一首

送謝氏昆季下第歸南陽序一首

送田八落第東歸序一首

江州卧疾送李侍御序一首

送十三舅適越序一首

送房七西游梁宋序一首

送薛九遠游序一首

送薄九自牧往義興序一首

送張十五往吳仲序一首

送觀往吳中序一首

送河長序一首

送蔣十九丈奏事畢正拜殿中歸淮南幕府序一

首

送于兵曹往江夏序一首

送李兵曹往江外序一首

送孟校書往南海序一首

送封判官攝監察御史之磧西序

陶翰

夫子以忠義為名以才能為用頃年投筆多制勝之謨
間歲策勳有斯皇之命以西師之未解右地之多虞何
寧此材豈獲居息我主將所以封弱水擒月氐畧康居
取勃律雖出車之任事屬於才能而入幕之賢功歸於
帷幄嗟乎非萬里無以見遠圖非三軍無以知壯節古
人於是歷孔道窮河源豈勤勞而樂行役甘絕域而厭
諸夏必以為擔石者能喪志懷安者也而拜命封侯功
成事立不同日言矣勉哉封子守其嘉謀韜軒將馳繡

服將假雖天下險阻玉關之風故不足為子慮耳帝鄉
山川徙倚將遠別路雲樹蒼茫欲秋可以贈離杯可以
贈離唱乃命座客唯然賦詩

送史判官之河南序

子始以詞進而果以政聞拔起翰林激昂儒服朝升一
尉暮入五府漢東之駕纔返河南之檄適至皇皇之命
未嘗寧居將欲拒其辟書韜其利用若清規雄烈已異
於天下矣周鄭之風好僻齊魯之政或訛使戎臣所以

政疑於勵精銳於填舉以東夏侯子得無戒之哉於是

中朝名士左補闕任侯序其詠謔太常主簿揚公鳩其
宴餞筆墨以之聚至文章以之感合不有君子胡寧是
焉中條氣凝河水將壯關中送客美使者之賢泗上諸
侯盛主人之禮慎爾行役勉哉軺軒別筵再興詞賦間
作故我有後甲之術凡不在任氏之唱者實隸於斯矣

送李叅軍水運序

壯哉大河之功也南分淮泗東委溟渤呀呷長川呼吸

萬里若舟楫是戒風濤無虞則三萬之廩可得而西矣
故朝廷大役實難其人李公精義宏高德量魁達聲聞
闕右義徹浙川我侍御史薛公資之以成務也於是驛
騎首路列筵在庭山川且長語笑云隔勵其節宣其規
使白波徐清紅粟流行則國家之事濟矣勉旃故交不
敏詩以投贈之

送李叅軍序

人生相知心乎僕之心嘗語君矣相天疑以志相忠以

言以居則無悶以動則無悔孰謂子非天下之知己乎
同官為僚同志為友豈不欲晤語終日盡平生之歡然
而天時者盈虛也人事者倏忽也一合一否與時而來
不有聚何以同二人心不有散何以見四方志長揖而
去勉哉東軒楊花初飛郊草先碧自秦及洛雲山千里
子衿之首章善矣吾從也

餞崔朔司功入計序

冬天子至自河華中使至司功崔公朝於京師禮也今

天下有道聲教必被要荒來格况其邇者乎政莫大於
殷會使莫大於述職故學於禮足以專對崔公近之矣
及夫三物成者斯義歟征騷如飛郊暮來祖渭上西眺
寒源無色賦皇華而送崔氏行焉

送蕭少府之幽州序

頃林胡大寇邊殺右將軍於是幽薊之北門不啟天子
方憂朔漠之事問盧龍之策公安得收其宏畧匣長劍
塊然為一尉哉夫感於事則忠義全登於危則臣節見

必也海水晏燕山空代雲胡沙談笑而靜蓋王師之義
全言未畢征馬將散三嘯於離郊之上敬而辭焉

送崔司戶過隴迎大夫序

夫公銜紼海裔東歸玉門戎夏已康金甲已息伊大夫
皆受賜矣矧司戶公詩禮是勗庭闈是故疑假輜軒登
隴雲而四望矣吾朋乃驅征騎攜旨酒歌白雲以贈之
關河始風秋草尚碧衆皆詩人也安闕乎文哉

送崔二十一之上都序

士之相知故不在舊僕一覩君詞志慷慨情幹絕人是
欲片心樹善君子風義相感笑言卒獲時不與而清秋
至樂未央而別恨生則臨歧憮然把袂如失蘭可佩也
擬而贈君酒可忘憂酌以酬我且士為疑當世虛已之
運主司推心之時而不能翰飛冲天凌勵勁翮非人英
也子之往矣吾無間然乃徵詩寮以贊行色

送孟大入蜀序

襄陽孟浩然精朗奇素幼高為文天寶年始游西秦京

師詞人皆歎其曠絕也觀其匠思幽妙振言孤傑信詩
伯矣不然者何以有聲於江楚間嗟乎夫子有如是才
如是志且流落未遇風塵所已疑謂天下無否泰無時
命豈不謬哉翰讀古人文見長揚羽獵子虛賦壯哉至
廣漢城西三千里清江黃緣兩山如劍中有微徑西入
岷峨有竒幽皆感子之興矣勉旃故交不才以文投贈

送惠上人還江東序

李頎

自延陵季子來詣上國齊魯晉鄭賢豪風靡及夫顧陸

入洛亦稱南金今錢塘惠上人捉一盃振一錫則呼吸
詞府頡頏朝顏長江之南世有詞人舊矣於是侍御史
王公維太子舍人裴公揔寄彼好事於焉首唱才賢翕
集文墨敷芬作者為之不寧詞林為之一振此公家本
富春棲於天竹白雲青岫方丈之居江風海濤一杯而
泛窮其興旨即空王之法門贖其精心有真如之理性
不然我羣公風流虛佇歌詠間作者豈無哉正月袂裳
東旅征帆南岸眺吳山而可見值湖水之將碧震澤千

里孤舟渺然比思我曹時開離贈卷也

送王大拔萃不第

俗從竹非

歸睢陽序

前人

才格可得而仰也文章可知而畏也故往年有公連之捷矣九流之學日盛三鼓之音未歇今茲有天官之阨矣天將啟子於世故命以才授子於亨故先以屈屈伸理也才位時也子姑感激毫翰增脩詞律冲天之舉吾倚而待焉歡洽豈常離言實早河岳西別悠哉鎬京庭

聞東瞻誰謂家遠草色將變雲天浩然詩而詠言將以
述志

送盧涓落第東還序

噫天生秀明雋而才之有九流胡蒙而屯之故君子守
之以知息之命而固有涓也不然者盧氏子魁岸特達
而若是尚脉脉於公車之下而三歲不覿哉灞城春潤
風喧景遲鷺聲始調柳色堪醉當此而裹足千里背而
東豈意者歟衆皆賦詩以慰行旅

送謝氏昆季下第歸南陽序

吾嘗游江表得二謝焉青青子衿始在童丱時已辨其
稍雲噴浪之兆江河蕭散垂二十秋忽然上京再瑩心
目詩騷之興天假流畧之興日新才藝克脩文鋒甚銳
吾以此自負不為非知人矣金門未偶征蓋言旋雲峰
閉於武閣春野開於楚鄧蓋將窮計一作討策府琢磨詞
律他日之奮六翮登九霄未為後一作非耳春水尚寒郊
草無色何以贈別必在乎斯文

送田八落第東歸序

田子行於古而志於文雅多清調將有新律鋒鏑甚銳
將來者其憚之勿以三年未鳴六翮小挫則遂有清谿
白雲之意夫才也者命在其中矣屈也者伸在其中矣
將子少安吾以是觀德灞亭柳綠昆池草青于何送歸
無易詩詠

江州卧疾送李侍御序

李華

侍御歷揔漢上湖陰江左之賦王府之入不匱愛人之

頌有餘前相國劉公居佐帝庭行恤人隱待御時賢高
譽盛府舊僚傳檄速駕江城風動當天心厭兵品物思
理將束貪狼之口掩破骨之傷濡足而前化危為安此
大丈夫懸弧四方之志與夫竄身漁釣山林枯槁異日
論也天下有道貧且賤焉恥也今聖人在上夔龍宣力
而老夫甘心貧賤得非人生窮達固有分耶方理舟潯
陽追跡幽人解纓網陵顛淳雖病痼齒哀而神王顛顛
之中齊榮辱一視聽是非哀樂無自入矣侍御忽告余

行余知悒焉軫心豈紛累未滌將悲亦有道且以簪擊
茶甌歌而餞之曰江沉沉兮雨淒淒洲渚沒兮玄雲低
傷別心兮聞鼓鞀

送十三舅適越序

舅氏適越華拜送西階之下俟命席端舅氏曰吾交待
御鮑君夫玉待琢者也知我者鮑君成我者鮑君是以
如越求琢於鮑昔子路去魯告顏生曰何以贈我夫贈
人以言古之道也况背楚山凌澗河覩會稽之險掉鏡

水之波窺禹穴之冥冥仰秦望之峨峨如不誠我汝將
若何華拜手曰柔而立咎繇所以成九德也寬而靜師
乙所以諧五聲也文犀明珠之珍伏於掌握之間此君
子所以恢令名也再拜稽首

送房七西游梁宋序

君子既學之患不能行也河南房敬叔其行之者歟我
思古人之道其房君哉安親於羈旅之中講道於茅茨
之下不改其樂以文會之吾與房也顏子屢空曾參衣

金史卷之二十一
卷七百二十一
敝聞宋之君子落落有奇節奇節發於仁義者也以顏
曾之行求仁義之均勉旃斯有望

送薛九遠游序

士之舒毛羽宣聲調不在高位在有道自王允玄晏發
左思名盛當時價歷百代薛都卿以夷澹養素以文章
導志自浙右游湖左一句一韻遍於衣冠江山為之鮮
潤煙景為之明滅其餘情性所得蓋古人之儔歟南陽
有畧兼有道之高玄晏之道論其措意則王允左思豈

其遠乎惠然訪余告以行邁將棹溪吳越濡扎江嶠東
南勝事落爾胷中况為諸侯上賓知大夫之官族古所
貴勉之哉病叟李遐叔贈

送薄九自牧往義興序

中明檢而能曠年邁體衰而人罕知之陽羨山深水濶
海隅幽阻而人罕知之以中明之玄姿默識陽羨之清
漪秀石人乎哉清乎哉之子所以為貴也詩者輔佐情
懷其舊俗則秦伯之讓德延陵之高風因是而阻王孫

緣物而興之遠也矣

送張十五往吳中序

邯鄲遐叔風病目疾家貧不能具藥爰以言自醫南陽張士容引帽攝策晨告余曰雖耕楚田而無耰費相里杭州刑部郎李君以道教我以文博我將求飭粥於二賢可乎余諭之曰嘗讀大雅美張仲之德子其後乎欲而求仁愚以為可今賢士君子多在江淮之間吾見二丈夫必開館拂席矜相如之玉聲畫家之有無也不爾

者人而不仁如禮何人而不仁如樂何息言息言此獲麟之絕筆也

送觀往吳中序

見觀送蘭州兄詩敬不踰節情而中禮是篇也得詩人之一端矣先王省方命太師陳詩以觀人風固非遠嶠之松雪清江之雲月變也久矣將如之何觀其勉之在昔蘭陵府君高平楚公栢仁疑作人邑名下同懿公兄弟三人有重名於天下鉅鹿蘭陵之穆也故揚州孝公後之觀

之世父也高平熒之嫡也吾後之宣城文昭公拓仁之嗣也故中丞蘇州後之夫知卿大夫之族姓班位之高下見貴春秋而此道將亡自族之不知況他人乎觀於經感士匄郊子之祖德於史慕子長孟堅之自叙羈旅無書往吳中蒐以備家傳之遺闕附之於篇吾病矣老矣是行也慰我祇命聿脩之心永泰二年四月庚寅叔父華序

送何萇序

廬江何秀才掉流千里候余柴門執弟子見師之禮余
竦然自何德以堪之意者賢大夫賈廬州待余異等談
余過實是以致秀才神邁氣專文詞有調孤雲超忽迥
出秋江若游公卿間必成名然赤光湛廬擬物冰斷其
發也在礪磨而已用此申千里之報也何氏之先詰比
千德通神明受策阜昌世為大官有勳有德適追來孝
亦以祝秀才也元老趙公華叅疇年之歡夫貴與尊議
功論德不究其涯秀才將奉郡之命宣方面之烈我思

古人實獲我心

送蔣十九丈奏事畢正拜殿中歸淮南幕府序

賈至

天子以淮海多虞黎人未久命舊相崔公董之公以封畧所覆澄清是圖辟柱史蔣公作之如翰負風以石投水于茲五稔方隅克定乃朝天闕將命述職帝用嘉之進其命秋七月流火言旋幕府懿親良朋寵行惜別曰兵興十年九州殘弊生人凋喪植物耗竭行者罹鋒刃

之艱處者困求奪之累豈不以連率之敗類使臣之無
恥獨揚州一隅人尚完聚屢遇海島震盪再當河南離
叛亟供職役之繁而室家相保耕績未罷得非崔公之
賢乎公之賢而其佐可知矣今朝廷多故戎狄未服塞
門不扃人心驚駭魚鹽之殷舳艫之富海陵所入也齒
草羽毛玄纁璣組東南所育也匡時之謀富人之術幕
府所畫也豈伊方隅是賴得不勉歟時臨歧贈言蓋各
有望衆君子之志其詩乎

送于兵曹往江夏序

予謫居洞庭歲三秋矣有客自蜀浮舟來者則河南于
侯能讀古人書辨當世務年過四十猶沉下位為靜者
之尚退乎先達之迨賢乎與子登麗譙緣鳥嶼一時累
月多情甚歡忽然挂帆告我行邁豈非窮轍不能濡故
也馮翊太守王公移鎮武昌好賢下士所以衣縫掖襲
藝文者歸之如川吾子東行謂得時矣

送李兵曹往江外序

千里之馬維而不馭則意在空谷而遠思豐草累鷲之
鷄構而不搏則心在窮微而愈懷雲霄是以濟時命代
之才或湮淪未遇之士眇然在滄海之上扁舟之中矣
李侯吾將鮑子也我知其為人立身清而廉從政敏而
達內以孝悌著外以信義稱嘉辰良宵疊疊清話又足
見林宗高識叔度宏量一命佐邑非以政學也再命環
衛之曹非以官擇也徒棲遲下位祿未代耕是以去游
鏡亭探禹穴水宿雲卧彌年始還今又疋馬出關艤舟

洛下念安石東山之賞懷子猷剡溪之興何雲思浩蕩
而野情寥廓哉予困於徒勞累在五斗昇沉風波之裏
踟躕長吏之前豈倉州遠蹈之情南陽躬耕之意臨歧
長酒有愧長劍想子行邁路經夷門見潁川陳兼河南
子頌為問道心無恙星鬢如何宿昔屢空復為安邑也
予近得陰君祕訣之北方河車郊原近山金鼎夕燎秋
來氣冷爐火適宜刀圭一開與子攜手

送孟校書往南海序

元結

平昌孟雲卿與元次山同州里以辭學相友幾二十年

次山今罷守春陵雲卿始典校芸閣於戲材業次山不如雲卿詞賦次山不如雲卿通和次山不如雲卿在次

山又非

集無非字

詡然求進者也誰言時命吾欲聽之次山

今且未老雲卿少次山六七歲雲卿名聲滿天下知已在朝廷及次山年雲卿何事不可勿隨長風乘興蹈海勿愛羅浮往而不歸南海幕府有樂安任鵬集作鵬與次

山最舊請任公為次山一白府主趨資裝雲卿使北歸

慎勿令徘徊海上請公等

集作弟

醉歌以送之

文苑英華卷七百二十

欽定四庫全書

文苑英華卷七百二十一

宋

李昉等

編

餞送四

送張玄武序一首

送王及之容州序一首

送譚山人歸雲陽序一首

餞副大使李藏用移軍廣陵序一首

秋夜送孟贊府兄還都序一首

春於南浦與諸公送陳郎將歸衡嶽序一首

秋於敬亭送從姪崇遊廬山序一首

江夏送倩公歸漢東序一首

冬夜於隨州紫陽先生飡霞樓上送烟子元演隱

仙城山序一首

金陵與諸賢送權十一昭夷序一首

春於姑熟送趙四流炎方序一首

送李侍御充汝州李中丞副使序一首

送王舍人歸壽春侍奉序一首

送祖評事赴黔府李中丞使幕序一首

送杜正字暫赴江陵拜觀叔父序一首

送溫司馬進降誕方物序一首

送宗判官歸滑臺序一首

桂林送前使判官蘇侍御歸上都府序一首

送姜司戶赴宣州序一首

送李彝宰新都序一首

秦中奉送前涪城賀拔明府歸蜀序一首

送張玄武序

元 結 集無

乙未中詔吳興張公為玄武縣大夫公舊友河東柳潛夫裴季安扶風竇伯明趙郡李長源河南元次山將辭讌言悉以言贈上有勸仁惠卹勞苦之風下有惜離異

戒行役之諭

一作論

元子聞之中有所指國家將日極太

寧垂休八荒故自近年兵出滇外訂者或曰西南少疲是以天子特有命也將天之命斯未易然於戲蜀之遺民化於秦漢純古之道其由未知無置

一作智

此焉

一有故字

姑取廢也如德以涵灌義以封植其教遲遠其人迎喁
至乎不可固未必也則曰保仁以敦養流惠以懷恤知
其所勞示其所安無以醜之當可然也潛夫聞之中興
不樂歎曰吾嘗與朋友有四方之異不甚感人如今之
心多問其故對曰嗟嗟子能有是言也吾故感焉行有
規矣多無曰我四十於此無曰我時祿位下哉公乃復
曰當不失於二公之意為異年觀會之方也已敢戒行
役敢自清慎終不貽朋友之憂何如於是醉歌中堂極

樂而已諸公有贈遞相編次

送王及之容州序

乾元初

集作中

漫叟浪家于灤溪之濱以耕釣自全而已

九江之人未相喜愛其意似懼叟衣食之不足耳叟亦不促促而從之有王及者異夫鄉人焉以文學相求不以羈旅見懼以相安為意不以可否自擇及於叟也如是之多叟在春陵及能相遊歲餘而去將行規之曰叟愛及者也無惑叟言及方壯可強藝業勿以遊方為意

人生若不能師表朝廷即當老死山谷彼區區於財貨
之末局局於權勢之門縱得鍾鼎亦胡顏受納行矣自
愛耿容州歡於叟者及見集作容州為叟謝主人聞幕
府野次久矣正宜收擇謀夫引信才士有如及也能收
引乎二三子賦送遠之什以系此云

送譚山人歸雲陽序

吾於九疑之下賞愛泉石今幾年能扁舟數千里來
遊者獨雲陽譚子譚子文學隱名山野隱身雲陽之阿

世如君何牧犢愛雲陽之宰峻公不出南岳三十年今得雲陽一峯下况譚子又在焉彼真可家之者耶子去

為吾謀於牧犢近峻公有泉

集有山山二字

石老樹壽藤縈垂

水可灌田一夫火可燒種菽粟近泉可為十數間茅舍

所詣纔通小船吾則

集作則吾

往而家矣此邦舜祠之奇恠

陽華之殊異漣泉之勝絕見峻公與牧犢嘗一二說之

松竹滿庭水石滿堂石魚負樽鳧舫運觴醉送譚子歸

于雲陽漫叟元次山序

餞副大使李藏用移軍廣陵序 李白

夫功未足以蓋世威不可以震主必挾此者持之安歸
所以彭越醢於前韓信誅於後况權位不及於此

集有者字

虛生危疑而潜苞禍心小拒王命是以謀臣將啖以節

鉞誘而烹之亦由

集作猶

借鴻濤於奔鯨膾生人於哮虎

呼吸江海橫流百川左縈右拂十有餘郡國討

集作計

未

及誰當其鋒我副使李公勇冠三軍衆無一旅橫倚天
之劍揮駐日之戈吟嘯四顧熊羆兩集蒙輪扛鼎之士

杖干將而星羅上可以決天雲下可以絕地維翕振虎

旅赫張王師退如山立進若電逝轉戰百勝僵屍盈川

水膏於滄溟陸血於原野一掃瓦解洗清全吳可謂萬

里長城橫斷楚塞不然五嶺之北盡餌虵豕

四字文粹
集本作盡

餌於
修地勢盤地蹙不可圖也而功大用小天高路遐社稷

雖定於劉章封侯未施於李廣使慷慨之士長吁

集作
呼

青雲且移軍廣陵恭揖後命組練照雪樓船乘風簫鼓

沸而三山動旌旆

集作
旗

揚而九天轉良牧出祖烈

集作
列

將登筵誥酣易水之風氣振武安之瓦海日

文粹作月

夜色

雲帆

文粹作河

中流席闌賦詩以壯三軍之士白也筆已老

矣序何能為

秋夜送孟贊府兄還都序

夫士有飾危冠佩長劍揚眉吐諾激昂青雲者莫不

二字

集作咸

誇炫意氣託交王侯若告之急難乃十失八九我

義兄孟子則不然耶道合而襟期暗親志乖而肝膽楚
越鴻鸞鳳立不循常流孔明披書每觀於大畧少君讀

易時作於小文四方賢豪泣

集作眩

然景慕雖長不滿

集作

過

七尺而心雄萬夫至於酒情中酣天機俊發則談笑

滿席風雲動人

集作天

非嵩立之

集作騰

精何以及此白以

弱植早飲香名况親承光輝恩甚華萼他鄉此別誰無

恨耶時林風吹霜散下秋草海鴈嘶月孤鶴翔

集作飛翔

雲

驚魂動骨憂瑟涕流

集作落涕

抗手緬邁傷如之何請各賦

詩以寵岐路

春於南浦與諸公送陳郎將歸衡嶽序

前人集無

仲尼旅人文王明夷苟非其時賢聖低眉况僕之不肖

者而遷逐枯槁固其宜耶朝心不開暮髮盡白而文粹無此

字登高送遠使人增愁陳郎將義風凜然英思逸發來

下專城之榻去邀才子之詩動清興於中流橫文粹作汎素

波而遙去諸公仰望不及文粹作連睨章祖之序慙起予輒

冠名篇文粹作賢之首作者嗤我乃為撫掌之資乎

秋於敬亭送從姪嵩遊廬山寺

余小時大人令誦子虛賦私心慕之及長南遊雲夢覽

七澤之壯觀酒隱安陸蹉跎十年初嘉興季父謫長沙

西還時余拜見預飲林下崑乃稚子嬉遊在傍今來有

成鬱負壯集作秀氣吾衰久矣見爾慰心中悲道舊破涕

啼集作乃為笑方集作告我遠涉西登香爐長山橫蹙九江

却轉瀑布天落半與銀河爭流騰虹奔雷集作激

射萬壑此宇宙之竒詭也其上有方湖石井不可得而

窺焉羨君此行撫鶴長嘯恨丹液未就白龍來遲使人

著鞭先往桃花之水孤負宿集作願慙未歸於名山終
期後來携手五岳情以送遠詩寧闕乎

江夏送倩公歸漢東序

昔謝安四十年卧白雲於東山桓公累徵為蒼生而一
起常與支公遊賞貴而不移大人君子神契冥集作冥契合

正可乃爾僕與倩公一面不忝古人言歸漢東使我心
痲夫漢東之國聖人所出神農之後季良為大賢爾來
寂寂無一物可紀有唐中興始生紫陽先生先生六十

而隱化若繼跡而起者惟倩公焉蓄壯志而未就期老成於他日且能傾產重諾好賢工文即惠休上人與江鮑徃復各一時也僕平生述作罄其草而授之思親遂行流涕惜別今聖朝已捨季布當徵賈生開顏洗目一見白日冀相視而笑於新松之山耶作小詩絕句以寫別意辭曰路入漢東國川藏明月輝寧知喪亂後更有一珠歸

言歸漢東

古本作興
言歸東

路入

集作
被美

冬夜於隨州紫陽先生飡霞樓上送烟子元演

隱仙城山序

吾與霞子元丹煙子元演氣激道合結神仙交殊身同
心誓老雲海不可奪也歷考天下周求名山入神農之
故鄉得胡公之精宇集作術胡公身揭日月心飛蓬萊起

飡霞之孤樓鍊吸景之精氣延我數子高談混元金書

玉訣盡在此矣白乃語及形勝紫陽因大誇其集無此字仙

城元侯聞之乘興將往別酒寒酌醉青田而少留夢魂

曉飛渡綠水以先去吾不凝滯於物與時推移出則以
平交王侯遁則以俯視巢許朱紱狎我綠蘿未歸恨不
得同棲烟林對坐松月有所感歎集作款然銘契譚石乘
春當來且抱琴卧花高枕相待以寵別賦而贈之

金陵與諸賢送權十一昭夷序

斯高柄秦嬴世不二三傑伏草與漢並出莽夷朱暉耿
鄧乃起自古英達未必盡用於當年去就之理在大運
耳我君六葉繼聖熙乎大粹作于玄風三清垂拱穆然紫極

天人其一哉所以風

集作青

雲之

集本文粹無之字

豪士散在商

釣四坐明哲皆清朝旅人吾希風廣成蕩漭浮世素受

寶訣為三十六帝之外臣即四明逸老賀知章呼余為

謫仙人蓋寶錄耳而嘗採姮女於江華收河車於清溪

與天水權昭夷服勤爐火之業久矣之子也冲恬淵靜

翰才

文粹作才幹

峻發白每一篇一札皆昭夷之所操吁捨

我而南若折兩

集作羽

翼時歲律寒甚

集作苦文粹作色

天風苦

集作枯

聲雲帆涉漢罔若絕電舉目四顧霜天崢嶸銜杯

叙離而群子賦詩以出餞酒仙翁李白辭

春於姑熟送趙四流炎方序

白以鄒魯多鴻儒燕魏

趙集作

饒壯士盖風土

集作俗

之然

乎趙少公

集作翁

才貌瓌雄

集作雅

志氣豪烈以黃綬作尉

泥蟠當塗亦猶鷄棲鶴籠不足以窘束鸞鳳耳以嫉惡

抵法遷于炎方辭高堂而墮

集作墜

心指絕國而

集作以

搖

恨天與水遠雲連山長惜光景於頃刻開壺觴於洲渚

黃鶴曉別愁聞命子之聲青楓暝色盡是傷心之樹然

自吳瞻秦日見喜氣上當攬玉弩摧狼狐洗清天地雷
雨必作自冀白日迴照丹心可明巴陵半道坐見還吳
之棹今雪解而松柏振色氣和而蘭蕙開芳僕西登天
門望子於滄集作西江之上吾賢可流水其道浮雲其身
通方大適何往不可亦何戚戚於岐路集作岐路哉

送李侍御充汝州李中丞副使序

任華

華州汝州兩京股肱郡也朝廷以股肱之郡非有股肱

之才者則不可造次任焉是以命華州牧兼御史中丞李公亟乘轅於汝所以輟於華而急於汝者何蓋由華已致理而汝久缺人久缺者何不易其遷故也然則州有兵而刺史為之使使不可以獨理爰命前監察御史李公為之副清泗上朝周之路絕漢東封汝之心岐然長城蕃我王室亦在副貳之力也且御史仲兄金吾將軍嘗處中司之雄職鎮於上洛之要地招我於芸閣之上假我以栢臺之榮與華甚厚同於骨肉華見侍御如

見金吾方將遠別值余有犬馬之疾不遂携酒灞岸賦
詩河梁魂銷暮雲心折秋草而已矣汝穎自古頗多奇
士荀陳令族豈無子孫君其善待之無忘推遷至如公
堂閑坐對三十六峯或青雲半收或新月初挂當有佳
句時時寄來

送王舍人歸壽春侍奉序

太子舍人王良輔時人覩之呼為玉人我心重之有如
瓊枝今隴西公即舍人譚公一作侯之親也公尤哀而憐

之情義同於長兄禮秩優於諸弟夫如是豈得為萬里之別乎蓋以舍人急於倚門之期切以趨庭之戀若之何因留之贈言贈言伊何莫過於勤孝立身伊何莫過於守正而已秋天壓溟海白波走洞庭後期何日悵惘

恨一作猿聲

送祖評事赴黔府李中丞使幕序

前人

自武陵守擁旄分閩有唐以來李公一人而已自非忠

義特達有文武才畧者曷以致茲公以黔巫之地西控
微瀘彭濮東接桂林象郡北漸巴峽南馳滄溟蓋蠻夷
獷俗罕遵聲教必藉於幕畫而詳延祖生豈伊異人即
我府主隴西公之嘉客也方將表於金闕而加之鐵冠
適會有黔中之命相繼而至夫天下之寶當與天下共
之况黔中桂林兄弟之國又何間然哉俾朝廷知黔中
得人與桂林得人何異出餞何許舜亭峩峩凭檻窺黿
鼉之窟酌酒滴魚龍之背金石絲竹雖有秦聲青山白

雲恨非吾土華承命製序因贈以言不慮吾子以忠貞
為本又當指蹤不選地感恩不顧身死見賢良則引而
薦之勿憚勿疑見仇怨則報之以德勿瑕勿疵吾常以
此為終身之寶今以終身之寶贈君以謂何如也

送杜正字暫赴江陵拜覲叔父序

前人

吾見驥子齟齬之時愛其神清知其才清今果爾也頃
漂淪荆楚既孤且貧求食於誰託身於誰四海茫茫未

獲所寄及過我隴西公獲所寄矣公以故人之子憐而收之去溝壑而寄乎南山罷轉蓬而蔭於桃李君子曰隴西公在正字為不孤已今離叔父頗久暫歸阮家之巷感知已厚恩尋赴李膺之門華與臨別撫其背曰高門積慶無忘乎聿脩厥德大名難繼繼宜其自強不息念哉

送溫司馬進降誕方物序

昔者黃帝生於壽丘文王生於岐陽數千年間以為盛

美况我明主感龍而生如鳳之鳴黃河為之清率土為
之寧豈壽丘岐陽足云哉是以四方牧守咸獻方物用
賀南山之壽長居北極之尊今此邦使乎誰膺慎擇則
司馬溫臚其人也臚相門子溫其如玉五德備焉堅其
如金百鍊成焉既出車彭彭群公追餞於北郭草亭龍
從群峯疊出青石逶迤秋水下藏碧沙對此為別歡酒
而已

送宗判官歸滑臺序

大丈夫其誰不有四方志則僕與宗袞二年之間會而
離離而會經途所亘凡三萬里何以言之去年春會於
京師是時僕如桂林袞如滑臺今年秋乃不期而會于
桂林居無何又歸滑臺王事故也舟車往返豈止三萬
里乎人生幾何而倏聚忽散遼曼若此抑知已難遇亦
復何辭歲十有一月二三子出餞於野霜天如掃低向
朱崖加以尖山萬重平地卓立黑是鐵色銳如筆鋒復
有陽江桂江畧軍城而南走噴入滄海橫浸三山則中

朝群公豈知遐荒之外有如是山水山水既爾人亦其然袞乎對此與我分手忘我尚可豈得忘此山水哉

桂林送前使判官蘇侍御歸上都序

前人

桂林秦所置郡也南臨天池東枕滄溟西馳牂牁北走洞庭地方三千里帶甲數萬卒實五府一都會矣連帥之任朝廷難其人往年命御史中丞張公公號為稱職去年又命我以佐之初張公受命之日以為五嶺荒服

不同於他邦百蠻獷俗不可以獨理乃薦武功蘇澣自
秘省校書郎除金吾掾攝監察御史以佐焉澣在幕中
多所匡輔洎張公家艱去職澣統其留務凜其正色操
持紀綱而十州之地晏如也洎如疑我公至止觀其迹

而美其政將表請焉澣辭以久辭墳墓不見兄弟已六

年願得生入武關一到闕下足矣公從之或筵於西堂

或罇於東樓或饌於亭臯

一作高亭

凡飲餞之盛未有若此

之綢繆者也且予有善公為揚之且予有功公為叙之

予有患公為排之子有屈公為伸之亦何異脫騏驎於
鹽車擲秋鷹於天畔乃騰騁難料擊搏在即亦足以快
意矣且爾兄吾兄也爾身吾身也雖萬里為別何別之
哉雖然不能不愴恨儻見二相國當為深陳江嶺安危
之體焉料子必見潘庶子因登高把酒南望千峯白雲
離披橫在山畔與我疇昔所見豈有異乎由是益令人
思北歸

送姜司戶赴宣州序

士莫不伸於知己屈於不知己頃姜生以調集不偶薄
言東歸乃告辭於吏部徐公公素知其才惜其去竟不
與之別無何授宣城掾得不謂小伸於知己乎秋天曉
晴碧色如掃橫度一鳥時時行雲益令姜生有懷吳會
况還家有循陔之慶移一作趨府有牒辟之命哉僕與斯
人曾未覲止其友人姜一作公正範與余善邀余序之範
誠以我筆家流則不知姜意以為如何也

送李彛宰新都序

宗室後進有以學術辭藻著稱者彛也少好學通九流
百家之言善屬文頗有大節去年制舉不捷無何以書
歷抵二相國論安邊術由是召試西掖凡數十百人彛
與莊若訥高郢同入高等何垂翅於制舉而奮翼於西
掖哉蓋道之屈伸命之通塞各有時也執政以彛大人
在蜀故授新都以榮之彛豈不欲高步臺省時時與朝
廷群公談笑所以俯就遠縣蓋為大人屈耳秦雲滿天
條聚忽散與子分飛亦爾也古人別遠貴於贈言子昔

為什邡令蓋鳴琴不下堂而理今領新都則異於彼焉
蓋以廬井灰於焚蕪之後眊庶瘡於刀箭之末樹立存
育洪惟艱哉况奔衝填湊晝夜風雨誅求供應旬晦山
岳其親庶務則宜戴星而出戴星而入焉其接賓客則
宜一沐三起一飯三吐焉此朋友之望也如月照雪峯
花飛錦江當有新詩時復寄來念之哉李生

秦中奉送前涪城賀拔明府歸蜀序


前人

吾嘗以忠孝禮義清慎此六者士君子立身從政之道
而兼之者稀涪城兼之矣何以知之嘗糾余郡又宰吾
邑每升其堂以觀其政况不以編戶遇我而以國士待
我情願交深貫於金石自我不見于茲五年長安相逢
如自天落而喜可知也公以時命未遇一作駕言于歸
南山巖巖分我鄉之南北秦雲日暮類吾徒之聚散况
公之仲兄季弟與余為忘年友涪水春風巴山秋月靡
游不同久阻山陽之歡又此河梁之別二事交戰祇酒

一作

我心今紫微郎常公朝廷之詞伯而公之舊也君

其請賦一詩以大誇西蜀父老矣



文苑英華卷七百二十一

欽定四庫全書

集部

文苑英華卷七百二十四至

詳校官監察御史臣范衷

助教臣常循覆勘

總校官進士臣朱銓

校對官中書臣王瓚

謄錄監生臣史映綵

欽定四庫全書

文苑英華卷七百二十三

宋 李昉等 編

餞送五

薦福寺後院送新興尉洛郊序一首

送李審秀才歸湖南序一首

重送李審却赴廣州序一首

送標和尚歸南岳便赴上都序一首

送虔上人歸會稽觀省便遊天台山序一首

送魏七秀才赴廣州序一首

夏夜對雨送李玘擢第還鄭州序一首

崔中丞城南池送徐侍郎歸京序一首

送成都成少尹赴蜀序一首

送吏部杜郎中兵部楊郎中入蜀序一首

送賀若員外巡按畢歸朝序一首

送韋員外充副元帥判官之東都序一首

送潁州李使君赴任序一首

送澤州李使君赴任序一首

送餘杭薛郡守入朝序一首

送孫侍御赴鳳翔幕府序一首

送王判官赴福州序一首

送洪州李別駕還任序一首

送韋評事赴河南召募畢還京序一首

送宇文協律赴江西序一首

送韋司直還福州序一首

送廣陵許戶曹充召募判官赴淮南序一首

送六合林明府清白名聞上都赴選序一首

送陳留張二十七少府鄆東都赴選序一首

薦福寺後院送辛嶼尉洛郊序 任 華

一昨渭北節度工部尚書臧公表薦辛嶼尉洛郊蓋知嶼事親以孝聞與朋友以信聞於吏道以幹聞不然非所聞也秋七月將之官乃胥命於此寺後庭蓋所以破臨岐之妄想銷操袂之煩惱也僧院少客蒼苔滿地終

南曉晴洗然黛色日暮飲罷鐘聲傍出一作山贈言曰子

之叔父以清白著稱歷踐臺省官至二千石子其刻已

自勵無墜叔父之風

操袂

操疑作揜下同韓集舉
正云晉人草書參作衆

送李審秀才歸湖南序

前人

平西原之歲隴西李審自湘東來才甚清氣甚和節甚
竒心甚高僕是以恨相知晚也秋九月又言歸於湘東
衆君子出餞于北郭碧峯巉巉出於栢稍有如虎牙夾
天而立加以白日欲落挂在巖半橫照灘水月帶微明

一作一
帶微月

操袂于茲揮袂于茲恨無崑山片玉以相贈贈
君桂林之一枝審再拜白幸甚

重送李審却赴廣州序

前人

吁嗟乎蒼梧之片雲或隨風而東或隨風而西片雲既
如是孤客亦如是昨日李生言歸湘東今日李生將赴
南海昨日今日豈有二李生乎亦猶前日蘇秦與今日
蘇秦不殊耳所以然者何耶蓋乘流則進見幾而作明
有志於四方非凝滯於一途其中或有不得已之事亦

不恠有也昔孔子嘗為東西南北之人張儀亦為燕趙齊楚之容其已乎滄波遠天混和暮色孤舟一去曷日而旋歸哉

送標和尚歸南岳便赴上都序 前人

南岳有大比丘其名曰道標性聰惠一作慧通用穎悟通於

禪門精於律儀善於說法該於儒術是以禪師伯之律師仰之法師宗之儒流服之自登戒壇凡四十餘夏致弟子彌漫於江嶺間不下萬二千人不然安得前後連

率新舊岳牧莫不嚮風稽首焉屬我中司隴西公方崇

東流之法化南越之俗是以惠然杖錫而公待

一作得

之

禮敬甚厚前隴西公曰維摩經不云乎法無往來常不

住故金剛經不云乎應無所住而生其心每念雙林樹

下將歸乎湘東郡又憶王舍城中當詣於漢北闕公難

違其意悵然久之乃命幕中樂安任華為之序序云彼

上人者甚為稀有方以般若為舟而浮于洞庭以大乘

為車而游于京師皇帝深信釋氏必將延入內殿問以

秘藏豈唯將相得歸依之地王侯發迴向之心而已乎
王疑曰如吾言焉

送虔上人歸會稽觀省便遊天台山序

前人

國書所載名山如天台者鮮矣故老萊遊于斯應真遊
于斯虔上人亦遊于斯老萊崇於孝者也應真崇於道
者也二公之美上人兼而有焉上人緇侶之澄肇詞場
之沈謝讀盡貝葉能了於空淨如蓮花不著於水不然

安得衆君子禮敬若是焉言歸膝下則孝名為戒將遊
物外而朗詠長川豈徒蔭長松以隱身承瀑布以洗足
是將探掇靈藥搜訪仙經歸獻北堂永同西母也鏡湖
秋月當見色空稽山片雲能引詩興剡溪白鳥知爾無
機雲門踈鐘訝君來暮豈不謂然耶今朝贈別桂林花
洞庭白煙濕袈裟虔上人與君各在天一涯

送魏七秀才赴廣州序

前人

此邦詞客往來亦云多矣其有論詩則為詩人對酒則

為酒徒如魏秀才元稹者不可多得况爾兄殿中侍御史萬成吾友將為遠別豈同他人江亭暮天勿辭一醉醉後解纜則月照滄海猿啼碧山其柰爾何

夏夜對雨餞李玕擢第還鄭州序

前人

今年東都秀才登第者凡十數人隴西李玕為之稱首且宗伯方以拔淹滯愍勤舊為務而玕則年甫二十餘豈張公意耶其如考舊文則上等試文策又上等欲以

年少棄可乎不可也朝廷由是翕然謂張公之用心也
周選才也當不膠柱於一途耳夏五月李玘將歸于鄭
我中司李公惜明晨東郊之別成此夜西園之會桐葉
滴其踈雨竹枝鳴其夕風夜酒既醉俾我小為之序

崔中丞城南池送徐侍郎歸

集作還

京序

獨孤及

侍郎昔為河南督郵河陽令其解龜也東人思其遺美
今出入夷險歷二十餘集無此字載而一來廳樹未老佐吏

半在公位望章綬輝光城邑觀者榮之而東都主人亦以籩豆醴筭徵會脩好之不暇凡萃止十有五日而去

去之日主人歎瞻仰

集作之佇

莫及也故又醞酒于此池池

上有雙彩艫與竹齋對布賓主位于罇之左右而蘭臺金閨建禮承明之英十有八人序列其次池外有闕塞雙嶺遙作外戶高高逶迤數峯當憲伊洛春樹若刺繡布錦仙桃火燃顧我則笑於是遊眺之不足則舉白以相勸而狂歌送之唱棹鳴榔簫鼓陳乎其間醉中疑三

江五湖去人不遠謂千慮萬事無非妄作况少別可以
興愴乎但駟馬行塵明日將遠登而無賦謂罇酒何宜
歌而詩之且以見追攀者之心也

二字集
作志

送成都成少尹赴蜀序

前人

歲次乙巳定襄郡王英又出鎮庸蜀謀亞尹僉曰左司
郎成公可溫良而文貞固能幹力足以參大畧弼成庶
務既條奏詔曰俞往公亦集無亦字朝受命而夕撰日卜十
一月癸巳出車吉尚書諸曹郎四十有二人歎軒騎將

遠故相與載籩豆醢笋封羊膾魴脩飲餞于肅明觀以
為好飲中客有賦蜀道難者公曰士感遇則忘軀臣受
命則忘家姑務忠信夷險一致患已不稱于位於行邁
乎何有言訖抗手建節即路且以怵集作紛悅刀礪侍輕

軒而西凡強學以脩業積行以取位赴知己不為名適
四方不違親卿大夫之孝也吾子其無忘可移之忠將
咨度是務使岷峨其人苟慝不作天聽自民誰謂蜀遠
別細故也豈薑芥乎凡今會同非詩無以導居者之志

送吏部杜郎中兵部楊郎中入蜀序

前人

二公罷東西之

集無之字

曹草奏啓事之劇而參軍西南時

人或譏朝廷易其大難其細及以為不然方今天子命

將帥以守四方丞相秉鉞為唐南仲擇佐命介宜先才

者賢者事孰大焉彼採薇出車以遣役勞勤我則異於

是受王命者不言勤赴知己者不愴離今日斗酒姑展

交好遂以道吾子

集無子字

四方之志亦使滿座歌二公乎

送賀若員外巡按畢歸朝序

今年春上以富人侯為丞相百揆時叙九州賦錯方欲齊職貢之法崇底慎之典使六府修九序成尚書吏部

郎中

集無中字

賀若公貞明直躬特達公器才足以懋功歲

事政足以弘道救物故俾繡衣持斧巡撫江介分王命也公電發神機霜淬智及其始至也問謠俗省疾苦命司書視年數之上下削邦縣之版圖實其衆寡以差井賦然後勞來安集宣皇恩而煦之饑者如得食寒者如

得續使苞茅之貢必叙而杼軸之詩不作冬十一月命
羣吏致事言旋于京師且將捧府檄於南陔侍版輿以
西上禮也夫其由自家以刑國資事親以事君奉慈訓
不廢陳力將君命不違色養忠孝之大者况姦宄已殄

集作
以弭

干戈將戢朝廷方以律令章程責成三府然操六

轡驟四駱周爰咨詢以成天下之務在是行乎翰飛方

騁瞻望何及唯獻熟

集作
酬

東閣弼成大猷使蒸人粒海

水靜農夫高枕及亦預焉九拜首

集作
執手

于路岐者請偕

賦鴻鴈取之子于征劬勞于野爰及矜人哀此鰥寡以
為善頌

送韋員外充副元帥判官之東都序

前人

太尉臨淮王之秉旄淮沂也天子命公為介洎臨淮薨

而相公

集作國

太原公繼授兵符盡護東夏諸將亦表公

叅成周軍事如初命故事官至左右掖垣不驅傳不就

辟

十二字集作登掖垣者不驅傳居諫臣者不就辟

將使其能必易其秩故自

左補闕為尚書郎元年仲春始以使節赴洛陽經大盜

虔劉之餘頑民雖遷汙俗未返三軍之心注於帥帥下帥

字集作師非

之耳目屬於叅佐以公貞諒文敏能恤大事且

成宣之後也故以部從事咨焉夫民殘則訛訛則流禁

流莫若以德兵不戢則翫翫則暴禁暴莫若以信建信

與德以為幕中之畫繫吾子是冀將賀不暇別於何有

我飲餞者姑以詩代路車乘馬

送潁州李使君赴任序

公之為潁州也朝廷以不失人為明潁人以得父母為
幸公獨以去色養為戚故執事者難之其為公謀者則
曰受命忘家公也愛親讓祿私也君子不以私廢公不
以孝棄忠况國家方親親賢賢而當潁人俟師長之日
可以此時急聞禮而緩君命乎公曰諾然後明日朱兩
轡而東竭力致身之誠於是乎全矣方當輯寧疲人襦
而袴之宜其大王事而小行役豈徂暑之熱遠道之思
與前期之難足攬胃臆賦詩勗別于以特贈

送澤州李使君兼侍御史充澤潞陳鄭節度副

使赴本道序

今歲皇帝擇可以守四方之臣分命大司徒涼公作藩

沂

集作岐

陽平秩西夏涼公季弟曰抱真敬事好學仁勇

忠信凡仁則不偷勇則不撓忠則能宣

集無宣字

力信則人

任焉故天子器之方倚以胥附使宅高平綏厥有衆董

次將之任且以柱後惠文冠冠之詔下之日軍府胥悅

蓋蕭何守關中舉宗詣軍而涼公荷方邵

英華有南字非

之寄

亦以愛弟居東旅于行間忠之大者夫高平上黨之地
趙魏燕代潞之咽喉太行恒山為之襟帶公居有專城
之任行有亞旅之職其畧足以固其封疆其惠足以柔
其民人勗哉夫子進吾往也伯兮仲兮執兵之要謹身
以肥家自家以刑國高平之政可以未行而窺矣彼瞻
望佇立壯夫耻之非歌詩莫足以贈

送餘杭薛郡守入朝序

有大道者遺小成之迹抱宏畧者非曲士所見公嘗以

匪躬之故三入承明時議用舟楫期公者七載矣而猶
建隼河壩洗幘江島興貝錦之歎詠跋胡之詩豈不以
名至盛德至廣而厦材多節夷道若類英華作類非乎今天

子受宣室之釐忽思賈誼以謗書之篋先示樂羊且搜

玄珠俾詣丹闕則巨鱗方縱未可料也雖欲抱黃老子作

非之術與赤松子遊公噐所歸難乎免於珪組矣夏五

月弭棹睢溪脂車而西火雲成峯郊草如織誰謂秦遠

跂予望之有以見升青集作赤霄捧白日在此行也謂攀

四牡者各賦南山有臺之四章取樂只君子德音是茂

以為志

集有之
爾二字

送孫侍御赴鳳翔幕府序

右扶風之地跨枕隴蜀扼秦西門帝命司徒為方叔開
府之日搜賢自貳於是孫侯以監察御史領司徒掾夫
子卿族也用文學纘緒而弟兄皆材伯曰宿以秋官即
辟丞相府仲曰絳拾遺君前及余為寮夫子則以貞幹
肅恪之能入主方書出佐戎政花萼灼於三臺時人榮

之二月丙午乘傳詣部人謂扶風於是乎有三幸獲白

額而南山有採藜藿者一幸也

先是司徒於南山擒賊帥高玉

今夫操

兵者如虎而司徒仁而愛人二幸也其府君則賢其幕

府多士而孫侯懿之以文德三幸也恪於德以臨事度

於

集作其

義以從政力於忠以成績吾子勉之其蔑不濟

矣士為知己者用豈干榮乎請居者歌之持貺行邁

送王判官赴福州序

松梓梗柟茂於深山不能逃匠石之顧賢士君子晦於

言迹不能使人不巳知其勢然也之子言忠信行篤敬
以文雅麗則括而羽之而世皆觀頤我獨儉德吾固知
長風六翮必有時而去及御史大夫李公之命介也辟
書四下果以嗣宗為首歲二月載驟四駱脂車而東閩
中者左溟海右百越嶺外峭峻風俗剽悍歲比饑饉民
方札瘥非威非懷莫可綏也議者其謂君臣戎幕以義
佐師律以禮報國士以直道罷人以德使安危懸於指
掌勝負決於談笑則咨謀之道弘矣豈椎髻殊俗覆車

畏途足為志士之怵惕哉凡我出祖者亦既偕賦

送洪州李別駕還任序

獨孤及

別駕者

以集作

嘗宰三縣佐四郡未始不以廉直為已任

亦未始以廉直銜已名仕有餘力則寄傲於琴趣遠是以曲高意精是以聲全得於心而形於手故非外獎所及當其操絃如操政焉時人知其琴不知其政善而無伐光而不耀故也今也來思集作上台解榻卿大夫士從之如不及時因觀操縵之妙可以見從政之道是行

也吾子其懋脩乃德恪儆爾位夫亦將抑與不暇求於

何有繼揚

二字集作唯湯

郢音明且將遠廬峰湓水大江間之

風景可同而聽不可共由是衆君子賦詩以壯別且曰

備折楊黃

集作皇

華之韻用抒他年之相思

送韋評事赴河南召幕畢還京序

前人

自唐蒙司馬相如開牂牁

漢書作牂牁

鑿零山於是西南夷

君長始受漢印及國家綏以大道振以長策滇越印越

世亦皆為外臣蠢茲六蠻獨抗王旅天子方將開外戶
掃絕漠故授相國衛公鉞俾出作方叔入為吉甫且慕
如貔之介士將剪長蛇之速飛由是分命我廷尉評事
韋公實佐其任公以止戈諭之採薇歌之使政有典則
人知義所故燕齊少年韓魏勁卒召募如景附赴敵如
焱馳自春至於月受命羽檄之下凡萬八千計然後
頒賜筭級將朝于京師夫勤王集事之謂忠周爰咨詢
之謂智復命而不愆集作
潛非于素之謂信姑樹三德載馳

六轡行當以柱下之書贊募中之畫是役也冥冥羽翰
非瞻望所及矣請俱集作皆賦以知魏風

送宇文協律赴江西序

前人

復周正之年天子以潤州刺史張公林

集作休

為豫章牧

集作太守

豫章之人既庶且富部從事縣大夫缺而不補先

以檄徵協律於會稽時人皆賀豫章之得賢協律之遭

遇君子則曰夫子乃有

集作之

餘地不啻切玉割

集作判

小

鮮而用其銚無乃不可乎夫子曰不然蓋其不患秩卑

而患已素餐不患國士之不我遇患遇之而不荅苟有
用我者吾其為執射乎於是舉帆西陵是日于邁然後
知大夫之感義而不私集作思其身也于越集作于或非長路

江臯暮春沉吟秦山悽愴鏡水豈不知今日斗酒明旦
不共顧懷安敗名無勇也怨別傷遠非丈夫也苟將申
其道而成其務則萬里咫尺少別何有二三子其詠歌
之以代雜珮

送韋司直還福州序

前人

遠別非難行路難行路非難相逢難始者與吾子會于
撫以吾一日長乎子子嘗敦弟兄之好而不吾先自雲
搖雨散九四悲秋而一會面亦既道舊別又繼之斯亦
可以愴矣然君子患德之不建集作速不患人之不我知
吾子克慎厥身以荷先大夫之覆露賁然將命為邦司
直被服文行而鏃礪之揚其家聲吾唯子之望豈行邁
與聚散足貽志士之忻戚乎是別也祇以歌詠貺吾子
而已

送廣陵許戶曹充召募判官赴淮南序

前人

冉駝不庭三年矣王師戒嚴將問罪荒服於是上將分
職慎選乃僚以許公有持斧舊名斷犀餘地故授以戎
政俾發卒于東夫三河之人豪全齊之人武荆吳之人
悍籍其餘勇可以盡敵信以致之緊公是賴然則論王
命敦師律度程以料民徵騎以濟衆歌事以遣役輯謀
以定功在是行乎高天晚秋殺氣動地靡靡岐路悠悠

旆旌送離如之何賦小戎以為好

送六合林明府清白名聞上都赴選序

前人

今之為邑者祇事趣辦而已矣之子獨以公廉不苛聞

於朝廷夫公則能廉

集作力

廉則不苛

集作苛

不苛則無害

六合之人飽是三德故家肥人讓而名隨之

集有宜字

其黜

陟考績

集作幽明

之日首冠

英華作守官非

賢能之選也宜哉上方

勤恤人隱渴良吏如不及之子令問將與位偕行當見

函洛春物迎馬首於千里之外勿謂蕪城衰草足愴遠
別二三子何以持贈其歌詩乎

送陳留張二十七少府鄭東都赴選序

前人

每歲孟冬

集作春

大冢宰懸象魏之法以官民材天下髦

士於是乎雲屯詞峯角立智刃今子投袂而起將鼓行

乎其間以嚴樂之材力利商周之衆寡

集無此十二字

其於湛

盧發硎批卻如玉繁弱在手捨拔則獲者吾惟子之望

當知君子廣其業達其道則榮譽貴仕可得而捨區區

秋風瑣瑣岐路又足為志士之感哉

十六字集作娟娟秋風悠悠遠道足

為志士之感哉

雜珮可以申永懷罇酒可以慰別緒其贈言之

分顧謂

集作調

座者志之

文苑英華卷七百二十二